

## 2-§. Асосий воситаларнинг келиб тушиши

7. Мулкка эгалик, хўжалик юритуви ёки тезкор бошқарув ҳуқуқи асосида хўжалик юритувчи субъектга тегишли бўлган асосий воситаларнинг қиймати корхона балансига киритилиши лозим.

8. Асосий воситалар қиймати корхона балансига:

а) капитал қўйилмалар тугаганидан сўнг қурилган объектни қабул қилиш-топшириш;

б) объектни олди-сотди шартномаси бўйича харид қилиш;

в) таъсисчиларнинг устав капиталига ҳиссалари;

г) текинга келиб тушиш (ҳада шартномаси бўйича);

д) айирбошлаш;

е) товар-моддий захиралар таркибидан ўтказиш;

ж) молиявий ижара (лизинг) шартномаси бўйича олиш;

з) қиймати аниқлаб бўлинган асосий воситаларга капитал қўйилмалар;

и) ортиқча (ҳисобга олинмаган) асосий воситаларни аниқлаш;

к) хўжалик жамиятининг таъсисчилари таркибидан чиқаётганда ёки тугатилаётган хўжалик жамиятининг мулки таъсисчилар ўртасида тақсимланаётганда асосий воситаларни олиш;

л) асосий воситаларга мулкка эгалик, хўжалик юритуви ёки тезкор бошқарув ҳуқуқини қўлга киритишга олиб келадиган бошқа операциялар ёки ҳодисалар натижасида киритилади.

9. Асосий воситалар актив сифатида тан олинганда улар бошланғич қиймат бўйича баҳоланади.